

44

中國名山勝蹟志叢刊
沈雲龍教授主編

揚

州

圖

K928.3/39

曉文
出版社



中國名山勝蹟志叢刊第五輯
沈雲龍主編

揚州圖

(一)

經

焦循
江藩輯

文海出版社

有限公司

印行

揚州

八卷

圖

經

焦循

江藩

合

輯

江蘇廣陵古籍刻印
社據嘉慶底本校刊

揚州圖經



揚州圖經目錄

卷一 周 秦 漢 三國 晉 劉宋

卷二 齊 魏 梁 北周 陳 隋

卷三 唐

卷四 楊吳 南唐

卷五 北宋

卷六 南宋一

卷七 南宋二

卷八 元 明

揚州圖經卷一

江都焦 循里堂

纂輯

甘泉江 藩子屏

事志一 周 秦 漢 三國 晉 劉宋

魯哀公九年秋吳城刊溝通江淮春秋左氏傳五十八

項羽本紀秦二世元年七月陳涉等起大澤中廣陵人

召平為陳王徇廣陵司馬遷史記七

案資治通鑑作秦二世二年餘詳人物

灌嬰傳韓信自立為齊王使嬰別將擊楚將公杲於魯北破之度淮盡降其城邑至廣陵班固漢書四十一

高惠高后文功臣表射陽侯劉纏兵初起與諸侯共擊秦爲楚左令尹漢王與項有隙於鴻門纏解難以破羽降漢高祖六年正月丙午封九年孝惠三年薨嗣子睢有罪不得代同上十六

師古曰卽項伯也射字或作貰者後人改也

顏師古漢書註十六

景帝本紀三年春正月吳王濞膠西王卬楚王戊趙王遂濟南王辟光菑川王賢膠東王雄渠皆舉兵反漢書五

吳王濞者高帝兄劉仲之子也高帝已定天下仲爲代王匈奴攻代仲不能守棄國亡間行走雒陽自歸天子天子爲骨肉故不忍致法廢爲郟陽侯高帝十一年秋

淮南王英布反劉仲子沛侯濞年二十有氣力以騎將
從破布軍布走荊王劉賈爲布所殺無後上患吳會稽
輕悍無壯王以填之諸子少乃立濞於沛爲吳王王三
郡五十三城已拜受印高帝召濞相之謂曰若狀有反
相心獨悔業已拜因拊其背告曰漢後五十年東南有
亂者豈若邪然天下同姓爲一家也慎無反濞頓首曰
不敢會孝惠高后時天下初定郡國諸侯各務自拊循
其民吳有豫章郡銅山濞則招致天下亡命者盜鑄錢
煮海水爲鹽以故無賦國用富饒孝文時吳太子入見
得侍皇太子飲博吳太子師傅皆楚人輕悍又素驕博

爭道不恭皇太子引局提吳太子殺之於是遣其喪歸
葬吳王愠曰天下同宗死長安卽葬長安何必來葬爲
復遣喪之長安葬吳三由此稍失藩臣之禮稱病不朝
京師知其以子故驗問實不病諸吳使來輒繫責治之
吳王恐爲謀滋甚及後使人爲秋請上復責問吳使者
使者對曰王實不病漢繫治使者數輩以故稱病且夫
察見淵中魚不祥今王始詐病及覺見責急愈益閉恐
上誅之計乃無聊惟上棄之而與更始於是天子乃赦
吳使者歸之而賜吳王几杖老不朝吳得釋其罪謀亦
益解然其居國以銅鹽故百姓無賦卒踐更輒與平賈

歲時存問茂材賞賜閭里佗郡國吏欲來捕亡人者訟
共禁弗子如此者四十餘年以故能使其眾鼂錯爲太
子家令得幸太子數從容言吳過可削數上書說孝文
帝文帝寬不忍罰以此吳日益橫及孝景帝卽位錯爲
御史大夫說上曰吳王前有太子之郟詐稱病不朝於
古法當誅文帝不忍因賜几杖德至厚當改過自新乃
益驕溢卽山鑄錢煮海水爲鹽誘天下亡人謀作亂今
削之亦反不削之亦反削之其反亟禍小不削反遲禍
太三年冬楚王朝鼂錯因言楚王戊往年爲薄太后服
私姦服舍請誅之詔赦罰削東海郡因削吳之豫章郡

會稽郡及前二年趙王有罪削其河間郡膠西王卬以
賣爵有姦削其六縣漢廷臣方議削吳吳王濞恐削地
無已因以此發謀欲舉事念諸侯無足與計謀者聞膠
西王勇好氣喜兵諸齊皆憚畏於是乃使中大夫應高
誑膠西王無文書口報王曰善歸報吳王吳王猶恐其
不與乃身自爲使於膠西面結之膠西遂發使約齊菑
川膠東濟南濟北皆許諾諸侯旣新削罰振恐多怨鼂
錯及削吳會稽豫章郡書至則吳王先起兵膠西正月
丙午誅漢吏二千石以下膠東菑川濟南楚趙亦然遂發
兵西齊王後悔飲藥自殺畔約濟北王城壞未完其郎

中令劫守其王不得發兵膠西爲渠率膠東菑川濟南
其攻圍臨菑趙王遂亦反陰使匈奴與連兵七國之發
也吳王悉其士卒下令國中曰寡人年六十二身自將
少子年十四亦爲士卒先諸年上與寡人比下與少子
等者皆發發二十餘萬人南使閩越東越東越亦發兵
從孝景三年正月甲子初起兵於廣陵西涉淮因并楚
兵天子乃遣太尉條侯周亞夫將三十六將軍往擊吳
楚遣曲周侯酈寄擊趙將軍爰布擊齊大將軍竇嬰屯
滎陽監齊趙兵吳楚反書聞兵未發竇嬰未行言故吳
相袁盎盍時家居詔召入見上方與鼂錯調兵竿軍食

問計盜對曰願屏左右上屏人獨錯在盜曰臣所言人臣不得知也乃屏錯錯趨避東廂恨甚上卒問盜盜對曰吳楚相遺書曰高帝王子弟各有分地今賊臣鼂錯擅適過諸侯削奪之地故以反爲名西共誅鼂錯復故地而罷方今計獨斬鼂錯發使赦吳楚七國復其故削地則兵可無血刃而俱罷於是上嘿然良久曰吾不愛一人以謝天下乃拜盜爲太常吳王弟子德侯爲宗正盜裝治行後十餘日上使中尉召錯給載行東市錯衣朝衣斬東市則遣袁盎奉宗廟宗正輔親戚使告吳如盜策至吳吳楚兵已攻梁壁矣宗正以親故先入見論

吳王使拜受詔吳王聞袁盎來亦知其欲說己笑而應曰我已爲東帝尙何謙拜不肯見盎而留之軍中欲劫使將盎不肯使人圍守且殺之盎得夜出走梁軍遂歸報條侯將乘六乘傳會兵滎陽至雒陽見劇孟喜曰七國反吾乘傳至此不自意全又以爲諸侯已得劇孟劇孟今無動吾據滎陽以東無足憂者至淮陽問父絳侯故客鄧都尉曰策安出客曰吳兵銳甚難與爭鋒楚兵輕不能久方今爲將軍計莫若引兵東北壁昌邑以梁委吳吳必盡銳攻之將軍深溝高壘使輕兵絕淮泗口塞吳饑道吳梁相敝而糧食竭乃以全彊制其罷極破

吳必矣。條侯從其策，遂堅壁昌邑。南輕兵，絕吳饒道。初，吳王之度淮，與楚王遂西，敗棘壁，乘勝前銳甚。梁孝王恐，遣六將軍擊吳，又敗梁兩將士卒，皆還走梁。梁數使使報條侯求救，條侯不許。又使使惡條侯於上，使人告條侯救梁，復守便宜不行。梁使韓安國及楚死事相弟張羽爲將軍，乃得頗敗吳兵。吳兵欲西，梁城守堅，不敢西，卽走。條侯軍會下邑，欲戰，條侯壁不肯戰。吳糧絕，卒飢，數挑戰，遂夜犇。條侯壁驚，東南。條侯使備西北，果從西北入。吳大敗，士卒多飢死，乃畔散。於是吳王乃與其麾下壯士數千人，夜亡去，渡江走丹徒，保東越。漢使

人以利啗東越東越卽給吳王出勞軍使人縱殺吳王

盛其頭馳傳以聞吳王子子華子駒亡走閩越史記一百六

景帝三年夏六月帝欲以吳王弟德哀侯廣之子續吳

竇太后不許乙亥徙汝南王非爲江都王王故吳地司馬

光資治通鑑十六

諸侯王表江都易王非景帝子立爲汝南王景帝二年

徙江都二十八年薨元朔二年王建嗣六年元狩二年

謀反自殺元始二年四月丁酉以易王庶孫盱眙侯子

宮紹封五年王莽篡位貶爲公明年廢漢書十四

江都易王非以孝景前二年立爲汝南王吳楚反時非

年十五有材氣上書自請擊吳吳已破徙江都治故吳

國師古曰治謂都之劉濞所居也

以軍功賜天子旗元光中匈奴大入

漢邊非上書願擊匈奴上不許非好氣力治宮館招四

方豪傑驕奢甚二十七年薨子建嗣建爲太子時邯鄲

人梁蚡持女欲獻之易王建聞其美私呼之因留不出

蚡宣言曰子乃與其公爭妻建使人殺蚡蚡家上書下

廷尉考會赦不治易王薨未葬建居服舍召易王所愛

美人淖姬等凡十人與姦建女弟徵臣爲蓋侯子婦以

易王喪來歸建復與姦異母弟定國爲淮陽侯易王最

小子也其母幸立之具知建事行錢使男子荼恬上書

告建淫亂不當爲後事下廷尉廷尉治恬受人錢財爲
上書論棄市建罪不治後數使使至長安迎徵臣魯恭
王太后聞之遣徵臣書曰國中口語藉藉慎無復至江
都後建使謁者吉請問恭太后太后泣謂吉歸以吾言
謂而王王前事漫漫今當自謹獨不聞燕齊事乎言吾
爲而王泣也吉歸致太后語建大怒擊吉斥之建遊章
臺宮令四女子乘小船以足蹈覆其舩四人皆溺二人
死後有雷波師古曰波讀爲陂天大風建使郎二人乘小船入
波中船覆兩郎溺攀船乍見乍沒建臨觀大笑令皆死
宮人姬八子有過者輒令羸立擊鼓或置樹上久者三

十日乃得衣或髡鉗以鉛杵舂不中程輒掠或縱狼令齧殺之建觀而大笑或閉不食令餓死凡殺不辜三十五人建欲令人與禽獸交而生子彊令宮人羸而四據與羝羊及狗交專爲淫虐自知罪多國中多欲告言者建恐誅心內不安與其后成光共使越婢下神祝詛上與郎中令等語怨望漢廷使者卽復來覆我我決不獨死建頗聞淮南衡山陰謀恐一日發爲所并遂作兵器號王后父胡應爲將軍中大夫疾有材力善騎射號曰靈武君作治黃屋蓋刻皇帝璽鑄將軍都尉金銀印作漢使節二十綬千餘具置軍官品員及拜爵封侯之賞

具天下之輿地及軍陳圖遣人通越繇王閩侯遣以錦帛奇珍繇王閩侯亦遣建荃葛珠璣犀甲翠羽鰲熊奇獸數通使往來約有急相助及淮南事發治黨與頗連及建建使人多推金錢絕其獄後復謂近臣曰我爲王詔獄歲至生又無驩怡日壯士不坐死欲爲人所不能爲耳建時佩其父所賜將軍印載天子旗出積數歲事發覺漢遣丞相長史與江都相雜案得兵器璽綬節反具有司請捕誅建制曰與列侯二千石博士議皆曰建失臣子道積久輒蒙不忍遂謀反逆所行無道雖桀紂惡不至於此天誅所不赦當以謀反法誅有詔宗正廷

尉卽問建建自殺后成光等皆棄市六年國除地入於漢爲廣陵郡絕百二十一年平帝時新都侯王莽秉政興滅繼絕立建弟盱眙侯子宮爲廣陵王奉易王後莽

篡國絕

同上五十三

諸侯王表廣陵厲王胥武帝子元狩六年四月乙巳立六十三年五鳳四年坐祝詛上自殺子孝王霸初元二年三月壬申紹封十三年薨建昭五年共王意嗣十二年薨建始二年哀王濞嗣十五年薨亡後元延二年靖王守以孝王子紹封十七年薨居攝二年王宏嗣三年

王莽篡位貶爲公明年廢

同上十四

廣陵厲王胥壯大好倡樂逸游力扛鼎空手搏熊羆猛獸動作無法度故終不得爲漢嗣昭帝初立益封胥萬三千戶元鳳中入朝復益萬戶賜錢二千萬黃金二千斤安車駟馬寶劍及宣帝卽位封胥四子聖曾寶昌皆爲列侯又立胥小子弘爲高密王所以褒賞甚厚始昭帝時胥見上年少無子有覬欲心而楚地巫鬼胥迎女巫李女須使下神祝詛女須泣曰孝武帝下我左右皆伏言吾必令胥爲天子胥多賜女須錢使禱巫山會昭帝崩胥曰女須良巫也殺牛塞禱及昌邑王徵復使巫祝詛之後王廢胥寢信女須等數賜予錢物宣帝卽位

胥曰太子孫何以反得立復令女須祝詛如前又胥女
爲楚王延壽后弟婦數相餽遺通私書後延壽坐謀反
誅辭連及胥有詔勿治賜胥黃金前後五十斤它器物
甚眾胥又聞漢立太子謂姬南等曰我終不得立矣乃
止不詛後胥子南利侯寶坐殺人奪爵還歸廣陵與胥
姬左修姦事發覺繫獄棄市相勝之奏奪王射陂草田
以賦貧民張宴曰射水之陂在射陽縣奏可胥復使巫祝詛如前胥
宮園中棗樹生十餘莖莖正赤葉白如素池水變赤魚
死有鼠晝立舞王后庭中胥謂姬南等曰棗水魚鼠之
怪甚可惡也居數月祝詛事發覺有司案驗胥惶恐藥

殺巫及宮人二十餘人以絕口公卿請誅胥天子遣廷尉大鴻臚卽訊胥謝曰罪死有餘誠皆有之事久遠請歸思念具對胥旣見使者還置酒顯陽殿召太子霸及子女董訾胡生等夜飲使所幸八子郭昭君家人子趙左君等鼓瑟歌舞王自歌曰欲久生兮無終長不樂兮安窮奉天期兮不得須臾千里馬兮駐待路黃泉下兮幽深人生要死何爲苦心何用爲樂心所喜出入無惊爲樂極蒿里召兮郭門閱死不得取代庸身自逝左右悉涕淚奏酒至雞鳴時罷胥謂太子霸曰上遇我厚今負之甚我死骸骨當暴幸而得葬薄之無厚也卽以綬

自絞死八子郭昭君等二人皆自殺天子加恩赦王諸子皆爲庶人賜諡曰厲王立六十四年而誅國除後七
年元帝復立胥太子霸是爲孝王十三年薨子共王意
嗣三年薨子哀王濩嗣十六共薨無子絕後六年成帝
復立孝王子守是爲靖王立二十年薨子宏嗣王莽時

絕同上六十三

江藩案諸侯王表與厲王胥傳不同表云胥在位六
十三年傳云六十四年考本紀胥立於武帝元狩六
年至宣帝五鳳四年共計六十二年傳誤三爲四也
表云共三十二年薨傳云二年薨共王立於孝元建

昭五年立十三年而薨是薨於孝成陽朔二年矣哀
王封於孝成建始二年建昭五年至建始二年四年
耳則表作十三年誤傳作三年亦誤當作四年表云
哀王立十五年薨傳云十六年哀王立於建始二年
自建始二年至永始元年共十五年成帝本紀孝王
子守立於元延二年自永始元年至元延二年共計
六年傳云後六年成帝復立孝王子守據此則傳云
十六年誤當從表作十五年表靖王立十七年薨傳
云二十年靖王立於元延二年自二年至王莽居攝
一二年共十七年若如傳云二十年是靖王薨於王莽

建國二年矣但王宏嗣位在居攝二年豈有靖王未死而王宏得嗣位之理哉當以表爲正

諸侯王表廣陵麴侯裘城陽共王子元朔四年三月乙丑封七年薨元狩五年侯成嗣六年元鼎五年坐酎金

免

漢書十五

案城陽共王喜城陽景王之子見漢書高五王傳

明帝紀永平元年八月戊子徙山陽王荆爲廣陵王遣

就國

范蔚宗後漢書二

廣陵思王荆建武十五年封山陽公荆性刻急隱害有才能而喜文法顯宗時西羌反荆不得志冀天下因羌

驚動有變私迎能爲星者與謀議帝聞之乃徒封荆廣
陵王遣之國其後荆復呼相工謂曰我貌類先帝先帝
三十得天下我今亦三十可起兵未相者詣吏告之荆
惶恐自繫獄帝復加恩不考極其事下詔不得臣屬吏
人惟食租如故使相中尉謹宿衛之荆猶不改其後使
巫祭祀祝詛有司舉奏請誅之荆自殺立二十九年死
帝憐傷之賜諡曰思王十四年封荆子元壽爲廣陵侯
服王璽綬食荆故國六縣元壽卒子商嗣商卒子條嗣
傳國於後同上四十二

案司馬彪後漢書郡國志廣陵郡十一縣元壽所食

之六縣無可攷

楊終傳建初元年大旱穀貴楊終以爲廣陵楚淮陽濟南之獄徙者萬數又遠屯絕域吏民怨曠乃上疏帝從之聽還徙者悉罷邊屯

同上四十八

安帝紀永初七年九月調零陵桂陽丹陽豫章會稽租米賑給廣陵飢民

同上五

順帝紀永和三年夏四月九江賊蔡伯流寇郡界及廣陵殺江都長

同上六

漢安元年九月庚寅廣陵盜賊張嬰等寇郡縣是歲廣陵賊張嬰等詣太守張綱降

同上

沖帝紀永嘉元年廣陵賊張嬰等復反攻殺堂邑江都
長冬十一月丙午中郎將滕撫擊廣陵賊張嬰破之

同上

廣陵賊張嬰復聚眾數千人反據廣陵太后以徐揚盜
賊益熾博求將帥三公舉涿令北海滕撫有文武才

拜撫九江都尉與中郎將趙序助馮緄合州郡兵數萬
人共討之三月撫等進擊眾賊大破之夏五月拜滕撫

中郎將督徐揚二州事九月滕撫進擊張嬰冬十一月

丙午破嬰斬獲千餘人東南悉平

資治通鑑
五十二

質帝紀本初元年春正月壬子廣陵太守王喜坐討賊
逗遛下獄死二月庚辰詔曰九江廣陵二郡數離寇害

殘夸最甚生者失其資業死者委尸原野昔之為政一物不得其所若已為之况我元元嬰此困毒方春戒節賑濟乏庾掩骼埋齒之時其調比郡見穀出稟窮弱收

葬枯骸務加埋恤以稱朕意

後漢書六

桓帝紀延熹九年沛國戴異得黃金印無文字遂與廣

陵人龍尚等共祭并作符書稱太上皇伏誅

同上七

東觀記曰戴異鈕田得金印到廣陵以與龍尚

李賢後漢書註

漢獻帝初平四年夏曹操還軍定陶徐州治中東海王朗及別駕琅琊趙昱說刺史陶謙曰求諸侯莫如勤王今天子越在西京宜遣使奉貢謙乃遣昱奉章至長安

詔拜謙徐州牧加安東將軍封溧陽侯以昱爲廣陵太守朗爲會稽太守

資治通鑑六十

孫策傳堅薨還葬曲阿已乃渡江居江都徐州牧陶謙深忌策策舅吳景時爲丹陽太守策乃載母徙曲阿與

呂範孫何俱就景

陳壽吳書一

呂範字子衡汝南人少爲縣吏後避亂過江東孫策異之遣往江都迎太妃

許嵩建康實錄一

陶謙以笮融爲下邳相使督廣陵下邳彭城糧運融遂斷三郡委輸以白入大起浮屠祠課人誦讀佛經招致旁郡好佛者至五千餘戶每浴佛輒多設飲食布席於

路經數十里費以鉅億計及曹操擊破陶謙徐土不安融乃將男女萬口走廣陵廣陵太守趙昱待以賓禮先是彭城薛禮爲陶謙所逼屯秣陵融利廣陵資貨遂乘酒酣殺昱放兵大掠因過江依禮旣而復殺之

資治通鑑六十一

案嚴衍資治通鑑補先是彭城薛禮爲陶謙所逼屯秣陵句在放兵大掠下

漢獻帝建安二年袁術遣使者韓胤以稱帝事告呂布因求迎婦布遣女隨之陳珪恐徐揚合從爲難未已往說布曰曹公奉迎天子輔贊國政將軍宜與協同策謀共存大計今與袁術結昏必受不義之名將有累卵之

危矣布亦怨術初不已受也女已在塗乃追還絕昏械
送韓胤梟首許市陳珪欲使子登詣曹操布固不肯會
詔以布爲左將軍操復遣布手書深加慰納布大喜卽
遣登奉章謝恩并答操書登見操因陳布勇而無謀輕
於去就宜早圖之操曰布狼子野心誠難久養卽增珪
秩中二千石拜登廣陵太守臨別操執登手曰東方之
事便以相付令陰合部眾以爲內應

同上六
十二

漢獻帝建安三年冬十月曹操屠彭城廣陵太守陳登
率郡兵爲操先驅進至下邳布自將屢與操戰皆大敗
陳登以功加伏波將軍

同上

孫策傳策攻破劉繇別將於海陵

吳書一

漢獻帝建安四年故廣陵太守徐璆得傳國璽

傳國璽術拘孫

堅妻所奪者獻之

胡三省資治通鑑註六十三

江藩案後漢書徐璆傳璆初爲荊州刺史後遷汝南

太守轉東海相無官廣陵太守事裴松之三國志註

引先賢行狀璆歷任城汝南東海三郡亦無廣陵太

守事通鑑云故廣陵太守豈別有所據耶

漢獻帝建安五年廣陵太守陳登治射陽

資治通鑑六十三

建安十八年正月曹公攻濡須權與相拒月餘曹公望

權軍歎其齊肅乃退初曹公恐江濱郡縣爲權所畧徵

令內移民轉相驚自廬江九江斬春廣陵戶十餘萬皆

東渡江江西遂虛

吳書二

文帝紀黃初五年秋八月為水軍親御龍舟循蔡潁浮

淮幸壽春揚州界九月遂至廣陵冬十月還許昌六年

秋八月帝遂以舟師自譙循渦入淮從陸道幸徐冬十

月行幸廣陵故城臨江觀兵戎卒十餘萬旌旗數百里

魏書二

黃初六年八月帝以舟師自譙循渦入淮尚書蔣濟表

言水道難通帝不從冬十月如廣陵故城臨江觀兵戎

卒十餘萬旌旗數百里有渡江之志吳人嚴兵固守時

天寒冰舟不得入江帝見波濤洶湧嘆曰嗟乎固天所

以限南北也遂歸資治通鑑七十一

張遼傳孫權復叛帝遣遼乘舟與曹休至海陵遼病篤

遂薨於江都帝為流涕魏書十七

王凌傳文帝踐阼拜散騎常侍出為兗州刺史與張遼

等至廣陵討孫權臨江夜大風吳將呂範等船漂至北

岸凌與諸將逆擊捕斬首虜同上二十八

魏明帝青龍二年五月吳主入居巢湖口向合肥新城

遣將軍孫韶張承入淮向廣陵淮陰資治通鑑七十二

孫亮傳太平元年春二月朔建業火孫峻用征北大將

軍文欽計將征魏八月先遣欽及驃騎呂據車騎劉纂
鎮南朱異前將軍唐咨軍自江都入淮泗

吳書三

孫綝傳綝與峻同祖綝父綽爲安民都尉綝始爲偏將
軍及峻死爲侍中武衛將軍領中外諸軍事代知朝政
呂據聞之大恐與諸督將連名共表薦滕胤爲丞相綝
更以胤爲大司馬代呂岱駐武昌據引兵還使人報胤
欲共廢綝綝聞之遣從兄慮將兵逆據於江都

同上十九

惠帝紀太安二年五月義陽蠻張昌舉兵反七月昌別
帥石冰寇揚州十一月揚州秀才周玘前南平內史王
矩前吳興內史顧祕起義軍討冰冰退自臨淮趣壽陽

征東將軍劉準遣廣陵度支陳敏擊冰

晉書四

陳敏字令通廬江人也少有幹能以部廉吏補尚書倉部令史及趙王倫篡逆三王起義兵久屯不散京師倉廩空虛敏建議曰南方米穀皆積數十年時將欲腐敗而不漕運以濟中州非所以救患周急也朝廷從之以敏爲合肥度支遷廣陵度支張昌之亂遣其將石冰等趣壽春都督劉準憂惶計無所出時敏統大軍在壽春以少擊眾每戰皆尅遂至揚州迴討徐州賊封雲雲將張統斬雲降敏以功爲廣陵相時惠帝幸長安四方交爭敏遂有割據江東之志其父聞之大怒曰滅我門者

必此兒也父亡去職東海王越當西迎大駕承制起敏
爲右將軍假節前鋒都督敏因中國大亂遂請東歸收

兵據歷陽

同上
一百

周處傳吳興人錢璿起義兵討陳敏東海王越命爲建
武將軍使率其屬會於京都璿至廣陵聞劉聰逼洛陽
畏慙不敢進帝促以軍期璿乃謀反時王敦遷尙書當
應徵與璿俱西璿陰欲殺敦藉以舉事敦聞之奔告帝
璿遂殺度支校尉陳豐焚燒邸閣自號平西大將軍入
州都督劫孫皓子充立爲吳王旣而殺之來寇周玘縣
帝遣將軍郭逸都尉朱典等討之並以兵少未敢前玘

率合鄉里義眾與逸等俱進討瓚斬之

同上五十八

愍懷太子傅通字熙祖惠帝長子幼而聰慧武帝愛之時望氣者言廣陵有天子氣故封爲廣陵王邑五萬戶

同上五

十三

晉元帝建武元年三月辛卯卽晉王位大赦改元有司請立太子王愛次子宣城公裒欲立之謂王導曰立子當以德導曰世子宣城俱有朗雋之美而世子年長王從之丙辰立世子紹爲王太子封裒爲瑯邪王奉恭王後仍以裒都督青徐兗三州諸軍事鎮廣陵

資治通鑑九十

明帝紀明皇帝諱紹字道畿元皇帝長子也建興初拜

東中郎將鎮廣陵

晉書六

明帝紀太寧三年秋七月辛未以尚書令郗鑒爲車騎

將軍都督青兗二州諸軍事假節鎮廣陵

同上

晉穆帝永和五年魯郡民五百餘家相與起兵附晉求

授於褚裒裒遣部將王龕

按當從晉書作徐龕

李邁將銳卒三千

迎之趙南討大都督李農帥騎二萬與龕等戰於代陂

龕等大敗皆沒於趙八月裒退屯廣陵陳遼聞之焚壽

春積聚毀城遁還裒上疏乞自貶詔不許命裒還鎮京

口解征討都督

資治通鑑九十八

天文志升平四年四月魏興陷賊聚廣陵三阿眾五六

萬六月兗州刺史謝元討賊大破之

晉書十三

廢帝海西公紀太和四年夏四月庚戌大司馬桓溫帥眾伐慕容暐九月戊子溫至枋頭以糧運不繼焚舟而歸辛丑慕容垂敗溫後軍於襄邑冬十月己巳溫收散卒屯於山陽十一月辛丑桓溫自山陽及會稽王昱會於涂中將謀後舉十二月遂城廣陵而居之

晉書八

太和五年大司馬桓溫自廣陵帥眾二萬討袁瑾癸丑

溫敗瑾於壽春

資治通鑑一百二

晉簡文帝咸安元年十一月癸卯桓溫自廣陵將還姑孰屯於白石丁未詣建康諷褚太后請廢帝立丞相會

稽王昱

同上
百三

咸安二年六月戊子護軍將軍庾希舉兵反於江北自

海陵入居京口桓温使周少孫破之擒希斬於建康

建康

實錄

八

孝武帝紀寧康元年秋七月己亥徐兗二州刺史南郡

公桓温薨九月以吳國內史刁彝爲北中郎將徐兗二

州刺史鎮廣陵

晉書
九

晉孝武帝寧康二年春正月己酉刁彝卒二月癸丑以

王坦之爲都督徐兗青二州諸軍事徐兗二州刺史鎮

廣陵

資治通鑑
一百二

孝武帝紀太元二年冬十月征西司馬謝元爲兗州刺

史廣陵相監江北諸軍

晉書
九

晉孝武帝太元四年五月秦兵六萬圍幽州刺史田洛於三阿去廣陵百里朝廷大震臨江列戍遣征虜將軍謝石帥舟師屯涂中石安之弟也右衛將軍毛安之等帥眾四萬屯堂邑秦毛當毛盛帥騎二萬襲堂邑安之等驚潰兗州刺史謝元自廣陵救三阿丙子難超戰敗退保盱眙六月戊子元與田洛帥眾五萬進攻盱眙難超又敗退屯淮陰元遣何謙等帥舟師乘潮而上夜焚淮橋邵保戰死難超退屯淮北元與何謙戴遂田洛共

追之戰於君川復大破之謝元還廣陵詔進號冠軍將

軍加領徐州刺史

資洽通鑑一百四

謝元傳苻堅自率兵次於項城眾號百萬先遣苻融慕容暉張蚝苻芳等至潁口梁成王先等屯洛澗詔以元為前鋒都督元先遣廣陵相劉牢之五千人直指洛澗即斬梁成及成弟雲步騎奔潰爭赴淮水牢之縱兵追之

晉書七十九

案此事資治鑑在孝武帝太元八年十一月

孝武帝太元十年會稽王道子好專權與太保謝安有隙安欲避之會秦王堅來求救安乃請自將救之壬戌

出鎮廣陵之步邱築壘曰新城而居之

資洽通鑑一百六

安帝紀隆安四年六月輔國司馬劉裕破孫恩於南山恩將盧循陷廣陵死者三千餘人

晉書十

晉安帝隆安五年六月甲戌孫恩浮海奄至丹徒使劉裕自海鹽入援大破之恩別將攻陷廣陵殺三千人寧朔將軍高雅之擊恩於郁洲爲恩所執

資洽通鑑一百十二

虞邱進傳邱進字豫之東海郊人隆安中從高祖征孫恩成句章城被圍數十日無日不戰身被數創至餘姚破賊張驃追至婁縣於蒲濤口與孫恩水戰又被重創

沈約
宋書

晉安帝元興元年桓元以劉牢之爲會稽內史牢之曰始爾便奪我兵禍其至矣劉敬宣請歸諭牢之使受命元遣之敬宣勸牢之襲元牢之猶豫不決移屯班瀆私告劉裕曰今當北就高雅之於廣陵舉兵以匡社稷卿能從我去乎裕曰將軍以勁卒數萬望風降服彼新得志威震天下朝野人情皆已去矣廣陵豈可得至耶裕當反服還京口耳於是牢之大集僚佐議據江北以討元參軍劉襲曰事之不可者莫大於反將軍往年反王兖州近日反司馬郎君今復反桓公一人三反何以自立語畢趨出佐吏多散走牢之懼使敬宣之京口迎家

失期不至牢之以爲事已泄爲元所殺乃帥部曲北走
至新洲縊而死敬宣至不暇哭卽渡江奔廣陵

資治通鑑一百

二十

劉敬宣牢之長子也爲桓元諮議參軍牢之敗於廣陵
相高雅之俱奔慕容超

晉書八十四

案晉書載紀慕容德傳桓元將行篡逆誅不附已者
冀州刺史劉軌襄城太守司馬休之征虜將軍劉敬
宣廣陵相高雅之江都長張誕並內不自安皆奔於
德晉書作慕容超誤矣

高祖武帝紀桓元從兄修以撫軍鎮丹徒以高祖爲中

兵參軍高祖東征廬循何無忌隨至山陰勸於會稽舉義高祖以爲桓元未據極位且會稽遙遠事濟爲難俟其篡逆事著徐於京口圖之至是桓修還京高祖托以金創疾動不堪步從乃與無忌同船共還建興復之計於是與弟道規沛國劉毅平昌孟昶並同義謀時桓修弟宏爲征虜將軍青州刺史鎮廣陵道規爲宏中兵參軍昶爲州主簿乃令毅潛往就昶聚徒於江北謀起兵殺宏孟昶勸宏出獵未明開門出獵人昶道規毅等率壯士五六十人因開門直入宏方噉粥卽斬之因收衆

濟江

宋書

案桓宏噉粥被殺事建康實錄在元興三年

晉安帝義熙八年劉毅至江陵多變易守宰輒割豫州
文武江州兵力萬餘人以自隨會毅疾篤郗僧施等恐
毅死其黨危乃勸毅請從弟兗州刺史藩以自副太尉
裕僞許之藩自廣陵入朝已卯裕以詔書罪狀毅云與
藩共謀不軌收藩賜死

資治通鑑
一百十六

檀祗傳祗字恭叔高平金鄉人八年遷右衛將軍出爲
輔國將軍宣城內史卽本號督江北淮南軍郡事青州
刺史廣陵相進號征虜將軍加節十年亡命司馬國璠
兄弟自北徐州界聚眾數百潛得過淮因天夜陰闇率

百許人緣廣陵城得入叫喚直上廳事祇驚起出門將處分賊射之傷敗乃入祇語左右賊乘闇得入欲掩我不備但打五鼓懼曉必走矣賊聞鼓鳴謂爲曉於是奔散追討殺百餘人

宋書四十七

案宋書但云八年十年而無年號建康實錄在義熙十年傳云傷敗乃入據實錄云箭及於股乃入則傷敗當作傷股

宋武帝永初三年三月檀道濟出爲鎮北將軍南兗州刺史鎮廣陵悉監淮南諸軍

資治通鑑一百十九

文帝紀元嘉元年秋八月癸卯南兗州刺史檀道濟進

號征北將軍

宋書五

元嘉三年夏五月乙未以征北將軍南兖州刺史檀道

濟爲征南大將軍戊戌以後將軍長沙王義欣爲南兖

州刺史

同上

禮志元嘉四年八月太傅長沙景王神主隨子南兖州

刺史義興鎮廣陵備所加殊禮下船及至鎮入行廟

同上

五十

宋文帝元嘉七年以遊擊將軍胡藩戍廣陵行府州事

資治通鑑一

百二十一

文帝紀元嘉七年十二月辛酉以南兖州刺史長沙王

義欣爲豫州刺史

宋書五

元嘉八年二月丁丑以太子右衛率劉遵考爲南兖州刺史六月己卯以徐州刺史竟陵王義宣爲南兖州刺

史

同上

元嘉九年六月壬寅以撫軍將軍荊州刺史江夏王義恭爲征北將軍開府儀同三司南兖州刺史南兖州刺史竟陵王義宣爲中書監中軍將軍

同上

元嘉十二年六月丹陽淮南吳興義興大水己酉以徐豫南兖三州會稽宣城二郡米數百萬斛賜五郡遭水

民

同上

元嘉十七年冬十月戊午以司空南兖州刺史江夏王
義恭爲司徒錄尚書事戊寅衛將軍臨川王義慶以本
號爲南兖州刺史同上

元嘉十八年夏五月壬申衛將軍南兖州刺史臨川王
義慶征北將軍南徐州刺史南譙王義宣並開府儀同

三司同上

元嘉二十年夏四月甲午立第六皇子誕爲廣陵王同上

元嘉二十一年二月甲午以廣陵王誕爲南兖州刺史
八月戊辰征西大將軍荊州刺史衡陽王義季爲征北
大將軍開府儀同三司南兖州刺史南兖州刺史廣陵

王誕爲南徐州刺史

同上

元嘉二十二年秋七月乙酉征北大將軍南兖州刺史
衡陽王義季改爲徐州刺史

同上

元嘉二十四年八月癸卯以南兖州刺史劉義賓爲徐
州刺史九月辛未以太子詹事徐湛之爲南兖州刺史

同上

元嘉二十六年三月乙丑申南北沛下邳三郡復

同上

冬十月廣陵王誕改封隨郡王甲辰以中軍將軍揚州
刺史始興王濬爲征北將軍開府儀同三司南徐兖二

州刺史

同上

元嘉二十七年十二月庚午虜僞主率大眾至瓜步同上

魏主攻彭城不克十二月丙辰朔引兵南下使中書郎

魯秀出廣陵

資治通鑑一百二十五

世祖紀太平真君十一年冬十有二月癸未車駕臨江

起行宮於瓜步山永昌王仁自歷陽至於江西高涼王

那自山陽至於廣陵諸軍皆同日臨江所過城邑莫不

望塵奔潰甲申義隆使獻百牢貢其方物又請進女於

皇孫以求和好帝以師婚非禮許和而不許婚使散騎

侍郎夏侯野報之詔皇孫為書致馬通問焉正平元年

春正月丙戌朔大會羣臣於江上班賞各有差丁亥輿

駕北旋

魏收魏書四下

魏主至瓜步壞民廬舍及伐葦爲筏聲言欲渡江建康震懼民皆荷擔而立魏主鑿瓜步山爲蟠道於其上設壇屋魏主不飲河南水以橐駝負河北水自隨餉上橐駝名馬并求和請婚上遣奉朝請田奇餉以珍羞異味魏主得黃甘卽噉之并大進酈酒左右有附耳語者疑食中有毒魏主不應舉手指天以其孫示奇曰吾遠來至此非欲爲功名實欲繼好息民永結姻援宋若能以女妻此孫我以女妻武陵王自今匹馬不復南顧

資治通鑑

一百一十五

臧質傳拓跋燾率大眾數十萬南出後無資糧惟以百姓爲命及過淮食平越石髓二屯穀至是抄掠無所人馬饑困闕盱眙有積粟欲以爲歸路之資一攻城不拔便引眾南向二十八年正月初燾自廣陵北返便悉力

攻盱眙

宋書七十四

索虜傳大舉北討以兵力不足尙書左僕射何尙之參議發南兗州三五民丁父祖伯叔兄弟仕州居職從事及仕北徐兗爲皇弟皇子從事庶姓主簿諸皇弟皇子府參軍督護國三令以上相府舍者不在發例其餘悉情暫行征符到十日裝束緣江五郡集廣陵

同上九十五

魏主大會羣臣於瓜步山上魏人緣江舉火丁亥魏掠居民焚廬舍而去魏人破南兗徐兗豫青冀六州殺傷不可勝計丁壯者卽加斬截嬰兒質於槩上盤舞以爲戲所過郡縣赤地無餘春燕歸巢於林木魏之士馬死傷亦過半國人皆尤之

資治通鑑一百二十六

元嘉二十八年春正月丁亥索虜自瓜步退走二月壬午車駕幸瓜步是冬徙彭城流民於瓜步

宋書五

武三王傳虜退走自彭城北過義恭不敢追其日民有告虜驅廣陵民萬餘口夕應宿安王陂去城數十里今追之可悉得諸將並請義恭又禁不許經宿太祖遣驛

至使悉力急追虜先已聞知乃盡殺所驅廣陵民輕騎

引去

同上六十一

索虜傳初太祖聞虜寇逆焚燒廣陵城府船乘使廣陵南沛二郡太守劉懷之率人民一時渡江虜以海陵多菹澤不敢往山陽太守蕭僧珍亦斂居民及流奔百姓悉入城臺送糧仗給盱眙賊逼分畱山陽又有數萬人攻具當往滑臺亦畱付郡城內垂萬家戰士五千餘人有白米陂

案白米陂疑是白水陂之誤

去郡數里僧珍逆下諸處水

注令滿須賊至決以灌之虜既至不敢停引去

同上九十五

三月壬辰征北將軍始興王濬解南兗州戊申以徐州

刺史武陵王駿爲南兖州刺史

同上五

元嘉二十九年十二月辛未以驃騎將軍南兖州刺史

江夏王義恭爲大將軍南徐州刺史錄尚書事如故

同上

元嘉三十年春正月戊寅以南兖州并南徐州

同上

閏月壬申以領軍將軍沈慶之爲鎮軍將軍南兖州刺

史甲午驃騎大將軍荊州刺史竟陵王誕改爲揚州刺

史

同上六

孝武帝紀孝建二年二月丙寅以鎮北大將軍南兖州

刺史沈慶之爲左光祿大夫開府儀同三司辛巳以尙

書右僕射劉延孫爲南兖州刺史八月辛酉以南兖州

刺史劉延孫爲鎮軍將軍離州刺史甲申以右衛將軍

檀和之爲南兖州刺史

同上

秋七月癸巳立第十四皇弟休茂爲海陵王

同上

海陵王傳孝建二年年十一封海陵王食邑二千戶

同上

七十九

孝建三年三月癸丑以西陽王子尙爲南兖州刺史秋

七月丙子以南兖州刺史西陽王子尙爲揚州刺史秘

書監建安王休仁爲南兖州刺史

同上

大明元年八月甲辰司空南徐州刺史竟陵王誕改爲

南兖州刺史

同上

大明二年夏四月甲午以海陵王休茂爲雍州刺史

同上

垣護之傳大明二年徵爲右衛將軍還於道聞司空竟陵王誕於廣陵反叛護之卽率部曲受車騎大將軍沈

慶之節度

同上
五十

大明三年夏四月乙卯司空南充州刺史竟陵王誕有罪貶爵誕不受命據廣陵城反殺兖州刺史垣闓以始興公沈慶之爲車騎大將軍開府儀同三司南充州刺史討誕甲子上親御六師車駕出頓宣武堂秋七月己巳剋廣陵城斬誕悉誅城內男丁以女口爲軍賞是日解嚴辛未大赦天下丙戌以新除車騎大將軍開府儀

同三司南兖州刺史沈慶之爲司空刺史如故

同上六

竟陵王誕字休文文帝第六子也元嘉二十年年十一封廣陵王食邑二千戶二十一年監南兖州諸軍事北中郎將南兖州刺史出鎮廣陵尋以本號徙南徐州刺史二十六年出爲都督雍梁南北秦四州荊州之竟陵隨二郡諸軍事後將軍雍州刺史以廣陵彫弊改封隨郡王大明元年秋出爲都督南兖南徐兖青冀幽六州諸軍事南兖州刺史餘如故至廣陵因索虜寇邊修治城隍聚糧治仗嫌隙旣著道路常云誕反三年建康民陳文紹上書曰私門有幸亡大姑元嘉中蒙入臺六宮

薄命早亡先朝賜贈美人又聽大姑二女出入問訊父
饒司空誕取爲府史恒使入山圖畫道路勤劇備至不
敢有辭不復聽歸消息斷絕姑二女去年冒啟歸訴蒙
陛下聖恩賜勅解饒吏名誕見符至大怒喚饒入交問
汝欲死邪訴臺求解饒卽荅官比不聽通家信消息斷
絕若是姊爲啟聞所不知誕因問饒汝那得入臺饒被
問依實啟答旣出誕主衣莊慶畫師王強語饒汝今年
敗汝姊誤汝官云小人輩敢持臺家逼我饒因叛走歸
誕卽遣王強將數人逐突入家內縛錄將還廣陵至京
口客舍乃墜死井中託云饒懼辜自殺抱痛懷冤冒死

歸訴吳郡民劉成又詣闕上書告誕謀反稱息道龍昔
伏事誕親見姦狀又見誕在石頭城內修乘輿法物習
倡警蹕道龍私獨憂懼向伴侶言之語頗漏洩誕使大
吏令監內執道龍道龍逸走誕怒鞭殺監又捕殺道龍
又豫章民陳談之上書訴枉稱弟詠之昔蒙誕采錄隨
從歷鎮大駕南下爲誕奉送牋書經涉危險時得上聞
聖明登阼恩澤周普回改小人使命微勤賜署臺位詠
之恆見誕與左右小人莊慶傳元祀潛圖姦逆言詞醜
悖每云天下方是我家有汝等不憂不富貴又常疏陛
下年紀姓諱往巫鄭師憐家祝詛詠之旣聞此語又不

見其事恐一旦事發橫罹其罪密以告建康右尉黃宣達并有啟聞希以自免元祀弟知詠之與宣達來往自嫌言語漏洩卽具以告誕誕大怒令左右飲詠之酒逼使大醉因言詠之乘酒罵詈遂被害自顧冤枉事有可哀其年四月上乃使有司奏誕罪上不許有司又固請乃貶爵爲侯遣令之國上將誅誕以義興太守垣闓爲兖州刺史配以羽林禁兵遣給事中戴明寶隨闓襲誕使闓以之鎮爲名闓至廣陵誕未悟也明寶夜報誕典籤蔣成使明晨開門爲內應成以告府舍人許宗之宗之奔入告誕誕驚起呼左右及素所蓄養數百人執蔣

成勒兵自衛明旦將曉明寶與閫率精兵數百人卒至而門不開誕已列兵登陴自在門上斬蔣成焚兵籍赦作部徒繫囚開門遣腹心率壯士擊明寶等破之閫卽遇害明寶奔逃自海陵界得還上乃遣車騎大將軍沈慶之率大眾討誕誕焚燒郭邑驅居民百姓悉使入城分遣書檄要結近遠時山陽內史梁曠家在廣陵誕執其妻子遣使要曠曠斬使拒之誕怒滅其家誕奉表投之城外世祖忿誕左右腹心同籍期親並誅之死者以千數或有家人已死方自城內叛出者車駕出頓宣武堂內外纂嚴慶之進廣陵誕幢主韓道元來降豫州刺

史宗慤徐州刺史劉道隆率眾來會誕中兵參軍柳光宗參軍何康之劉元邁幢主索智朗謀開城北門歸順未期而康之所鎮隊主石貝子先眾出奔康之懼事泄夜與智明斬關而出誕禽光宗殺之光宗柳元景從弟也康之母在城內亦爲誕所殺誕見眾軍大集欲棄城北走留中兵參軍申靈賜居守自將騎步數百人親信並隨聲云出戰邪趨海陵道誕將周豐生馳告慶之慶之遣龍驤將軍武念追躡誕行十餘里眾并不欲去請誕還城誕曰我還卿能爲我盡力不眾皆曰願盡力左右揚承伯牽誕馬曰死生且還保城欲持此安之速還

尙得入不然敗矣慶之所遣將戴寶之單騎前至刺誕
殆獲誕懼乃馳還武念去誕遠未及至故誕得向城既
至曰城上白鬚非沈公邪左右曰申中兵誕乃入以靈
賜爲驃騎府錄事參軍王璵之爲中軍長史世子景粹
爲中軍將軍州別駕范義爲中軍長史其餘府州文武
皆加秩先是右衛將軍垣護之左軍將軍崔道固屯騎
校尉龐番蚪太子旅賁中郎將殷孝祖破索虜還至廣
陵上並使受慶之節度誕幢主公孫安期率兵隊出降
誕初閉城拒使記室參軍賀弼固諫誕怒拙刃向之乃
止或勸弼出降弼不可服藥自殺贈車騎將軍山陽海

陵二郡太守長史如故幢主王璵之賞募數百人從東門出攻龍驤將軍程天祚營斷其弩弦天祚擊破之卽走還城誕又加申靈賜南徐州刺史軍主馬元子踰城歸順追及殺之乃於城內立壇誓誕將敵血署輔國將軍孟玉秀曰陛下親敵羣臣皆稱萬歲初誕使黃門呂曇濟與左右素所信者將世子景粹藏於民間分以金寶齊送出門並各散走惟曇濟攜負景粹十餘日爲沈慶之所捕斬之誕所署平南將軍虞季充又出降書上使慶之於桑里置烽火三所誕又遣千餘人自北門攻強弩將軍苟思達營龍驤將軍宗越擊破之開東門掩

攻劉道隆營復爲殷孝祖及員外散騎侍郎沈攸之所破誕加申靈賜左長史王璵之右長史范義左司馬將軍孟玉秀右司馬右將軍五月十九日夜有流星大如斗杆尾長十餘丈從西北來墜城內是謂天狗占曰天狗所墜下有伏尸流血誕又遣一百人出東門攻劉道產營別遣疑兵二百人出北門沈攸之於東門奪短兵接戰大破之門者又爲苟思達所破誕又遣數百人出東門攻寧朔司馬劉勔營攸之又破之廣陵城舊不開南門云開南門者不利其主至誕乃開焉彭城邵領宗在城內陰結死士欲襲誕先欲布誠於慶之乃說誕求

爲問牒見許領宗旣出致誠畢復還城內事泄誕鞭二百考問不服遂支解之上遣送章二紐其一曰竟陵縣開國侯食邑一千戶募賞禽誕其二曰建興縣開國男三百戶募賞先登若克外城舉一烽克內城舉兩烽禽誕舉三烽上又遣屯騎校尉譚金前虎賁中郎將鄭景元率羽林兵隸慶之誕復遣三百人自南門攻劉勔土山爲勔所破慶之填塹治攻道值夏雨不得攻城上每璽書催督之前後相繼及晴再怒使太史擇日將自濟江太宰江夏王義恭上表諫乃止七月二日慶之率眾軍進攻剋其外城乘勝而進又剋小城誕聞軍入與申

靈賜走趨後園隊主沈胤之義征客周滿胡思祖馳至
誕執玉環刀與左右數人散走胤之等追及誕於橋上
誕舉刀自衛胤之傷誕面因墜水引出殺之傳首京邑
時年二十七因葬廣陵貶姓留氏同黨悉誅殺城內男
爲京觀死者數千女口爲軍賞誕母殷妻徐並自殺追
贈殷長寧園淑妃八年前廢帝卽位義陽王昶爲征北
將軍徐州刺史道經廣陵上表曰伏見故賊劉誕稱戎
犯節自貽逆命膏斧嬰戮在憲已彰但尋屬忝皇枝位
叨列辟一以罪終魂骸莫赦生均宗籍死同匹豎旅空
委離封樹不修今陛下繼明升運咸與維新乞簿改編

祔微表窀穸詔曰征北表如此省以慨然誕及妻女並
可以庶人禮葬并置守衛太宗泰始四年又更改葬祭

以少牢

同上七
十九

劉秀之傳廣陵王誕爲逆秀之入守東城

同上八
十一

沈懷文傳竟陵王誕據廣陵反及城陷士庶皆羸身鞭
面然後加刑聚所殺人首於石頭南岸謂之髑髏山沈
懷文陳其不可上不納

同上八
十二

卜天與傳天與弟天生以兄死節爲世祖所留心稍至
西陽王子尙撫軍參軍加龍驤將軍隸沈慶之攻廣陵
城天生推車塞塹率數百人先登西北角徑至城上賊

爲重柵斷攻道苦戰移日不拔乃還詔曰天生始受戎
任甫造寇壘而投輪越塹率眾先騰驍壯之氣嘉歎無
已可且賜布千匹以厲眾校同上九十一

倖臣傳劉係宗丹陽人也少便書畫爲宋竟陵王誕子

景粹侍書誕舉兵廣陵城內皆死勅沈慶之赦係宗以

爲東宮侍書蕭子顯南齊書五十六

魏虜傳盧紹之字子緒范陽人自云盧諶元孫宋大明

中預攻廣陵勲上紹之拔迹自投上以爲州治中同上五十七

大明四年八月己酉以晉安王子勳爲南兖州刺史宋書

六

大明五年六月壬子分廣陵置沛郡省東平郡并廣陵

同上

大明六年四月庚申原除南兖州大明三年以前逋租

同上

大明七年正月庚寅以南兖州刺史晉安王子勛為江

州刺史同上

禮志二月甲寅輿駕巡南豫兖二州冕服御玉路辭二

席改服通天冠御木路建大麾備春蒐之典同上

十八

甲寅上巡南豫南兖二州壬戌大赦甲子如瓜步山壬

申還建康

資治通鑑一百二十九

前廢帝紀景和元年九月庚子以南兗州刺史永嘉王

子仁為南徐州刺史丹陽尹始安王子真為南兗州刺

史宋書

戊午車駕幸瓜步開百姓鑄錢同上

明帝紀泰始二年正月甲午以青州刺史劉祗為南兗

州刺史三月辛亥鎮北將軍南徐州刺史桂陽王休範

領南兗州刺史秋七月己丑鎮北將軍南徐兗二州刺

史桂陽王休範進號征北大將軍辛卯鎮軍將軍徐州

刺史張永改為南兗州刺史辛亥南兗州刺史張永復

領徐州刺史九月庚戌以太子左衛率建平王景素爲

南兖州刺史

同上八

高帝紀明帝加太祖輔國將軍率眾東討徐州刺史薛安都反彭城從子索兒寇淮陰徵太祖討之出次新亭前軍已發而索兒自睢陵渡淮馬步萬餘人擊殺臺軍主孫耿縱兵逼前軍張永營告急明帝聞賊渡遽追太祖往救之屯破釜索兒向鐘離永遣寧朔將軍王寬據盱眙遏其歸路索兒擊破臺軍主高道慶走之於石鼈將西歸王寬與軍主任農夫先據白鵠澗張永遣太祖馳督寬索兒東要擊太祖使不得前太祖鼓行結陣直

入寬壘索兒望見不敢發經數日索兒引軍頓石梁太祖追之至葛冢賊眾大敗追奔獲其器仗屯石梁澗北太祖議欲於石梁西南高地築壘通南道斷賊走路索兒果來爭之太祖率軍擊破之

南齊書一

案宋書明帝紀薛安都反在泰始二年

泰始三年八月壬寅以中領軍沈攸之行兖州刺史率

眾北討

宋書八

泰始四年五月癸亥以劉韞爲南兖州刺史秋七月庚

申以驍騎將軍齊王爲南兖州刺史

同上

泰始六年南兖州刺史蕭道成在軍中久民間或言道

成有異相當爲天子上疑之徵爲黃門侍郎越騎校尉
道成懼不欲內遷而無計得留冠軍參軍廣陵荀伯玉
勸道成遣數十騎入魏境安置標榜魏果遣遊騎數百
履行境上道成以聞上使道成復本任秋九月命道成
遷鎮淮陰以侍中中領軍劉劭爲都督南徐兖等五州
諸軍事鎮廣陵資治通鑑一百三十二

泰始七年四月甲辰於南兖州置新平郡十二月丁酉

分豫州南兖州立南豫州宋書八

秋七月戊寅以寧朔將軍沈懷明爲南兖州刺史同

元徽二年五月壬子桂陽王休範舉兵反南兖州刺史

沈懷明戍石頭

同上九

六月庚子以平南將軍齊王爲中領軍鎮軍將軍南兗

州刺史

同上

順帝紀昇明元年以中領軍鎮軍將軍南兗州刺史齊王爲司空錄尚書事驃騎大將軍刺史如故丙午以司空南兗州刺史齊王改領南徐州刺史征虜將軍李安

民爲南兗州刺史

同上十

昇明二年二月辛卯郢州刺史新除鎮南將軍黃回爲鎮北將軍南兗州刺史南兗州刺史李安明爲郢州刺史四月辛卯新除鎮北將軍南兗州刺史黃回有罪賜

死甲午輔國將軍淮南宣城二郡太守蕭映行南兖州

刺史九月戊申行南兖州刺史蕭映爲南兖州刺史同上

江藩案東晉初僑置南兖州於廣陵明帝又立南沛
南下邳等郡以屬徐兗二州晉末又僑立南青州南

齊書所稱廣陵控接三齊青兗同鎮也然晉時都督

青兗二州徐兗二州以及徐兗青冀幽五州軍事揚

江荆司豫徐兗青冀幽并梁益雍涼十五州軍事或

鎮京口或鎮廣陵或鎮下邳或鎮馬頭或鎮金城劉

宋時或鎮京口或鎮廣陵或鎮盱眙如王恭之討道

子沈慶之之征魯爽皆在京口凡事不在廣陵者茲

不具錄餘詳沿革職官

揚州圖經卷一終